

Ils avats da la claustra da Mustér (Part 1)

Da l'origin da la claustra al 17avel tschientaner

■ La claustra da Mustér è vegnida fundada enturn l'onn 700. Tenor la tradiziun (*Passio Placidi*, 12avel tschientaner) ha il muntg francon Sigisbert erigi in'emprima cella en la *Desertina*. Ina claustra per propi è Mustér daventà enturn il 750 sut l'avat Ursicinus. En ina pitschna seria preschenta il LIR la glista (fin il 13avel tschientaner approssimativa) dals avats da Mustér e las biografias correspondentas en urden cronologic.

Ursicinus

Tenor il num probablmain in Ret che cumpara en la mesadad dal 8avel tschientaner sco episcopus (uvestg) en il cudesch da fraternisaziun da Rehanau a la testa da la claustra da Mustér organisa da el. La colliaziun da la dignità da l'avat cun quella da l'uvestg va probablmain enavos sin ina tradiziun irofranca da avats ed uvestgs ambulants e betg sin in'influenza visigotica presumtiva attribuida a Pirmin, avat da Rehanau. Quai lascha a medem temp presumar che Ursicin presidiava ina cuminanza che viveva tenor la regla maschadada iro-franca.

Carl Pfaff

Thüring von Attinghausen (Schweinsberg)

Attestà per l'emprima giada il 1314 a Nossadunnaun, † 3 da november 1353 a Mustér. Probablmain figl da Diethelm I e dad Elisabeth von Kempten. Nev da Werner II, cusrin da Johannes. Sco giuven muntg a Nossadunnaun ha Attinghausen assistì a l'assagl da la claustra tras



Avat Cristian de Castelberg e Gregor de Sax, il chau da la Lia Grischa, beneventan il cardinal Carlo Borromeo a Mustér (1581).

ils da Sviz (1314). Sco avat da Mustér 1327–53 è el s'engaschà per megliar l'administraziun e la scola claustrala. Il 1333 ha Attinghausen aderi a la coaliziun cunter Donat de Vaz. Il 1350 èsi reusi ad el d'intermediar en l'uschenumnà Marchenstreit tranter Sviz e Nossadunnaun. Il 1351 è il territori da la claustra vegnì integrà en la zona d'assistenza reciproca, circumscribta tras il Patg da Turitg.

Hans Stadler

Jakob Buchhorn

Descendent d'ina famiglia nobla da la Svevia. Elegì il 1357 (evl. già il 1353/54) avat da la claustra da Mustér. Buchhorn è stà l'emprim a defender la claustra cun success cunter las tentativas d'annexiun interprendidas a moda illegala da l'uvestg da Cuir, Peter I Gelyto. El ha cedi als Blegnasc, probablmain per motivs finanzials, quatter alps da la claustra da Mustér al Pass dal Lucmagn, svegliand qua tras malaveglia en la Cadi. Ils 19 da matg 1367 è el vegnì assassinà, suenter avair affittà era las minieras da Medel ad interprenders da la Svizra Centrala.

Adolf Collenberg

Johannes von Ilanz

Avat da Mustér dal 1367–1401, numnà *filius domini Enzii Maradie*. Suenter l'assassinat da ses predecessur, Jakob Buchhorn, tras glied da la Chadé e l'incendi da la claustra e da la baselgia (1387), ha Johannes von Ilanz restaurà la claustra. El ha revocà la concessiun contestada da las minieras da Medel ad abitants da la Svizra Centrala ed ha dublà il 1371 il pegn als Blegnais per las alps claustralas sin il Pass dal Lucmagn, nua ch'el ha fundà il 1374 in ospizi. Il 1376 ha el confermà in'allianza da transit tranter la Cadi e la Val dal Blegn, rinforzond il moviment communal (participaziun dal mastral e dals ministerials); il 1395 è el stà in dals confundatur da la Lia Sura/Lia Grischa (dals signurs) a Glion (amplifitgada il 1424 a Trun). Cun la Cadi èsi reussi a Johannes von Ilanz il 1401 da liberar la claustra da l'avugadia dals Werdenbergs.

Ursus Brunold

Pieder de Pultengia (Pontaningen, Puldingen)

Menziunà per l'emprima giada ils 11 da november 1398, † 17 da december 1438. Figl da Claus, chavalier. Attestà en ils onns 1398–99 sco custodi da la claustra da Mustér, da la quala el è stà avat dal 1402–38. Pultengia ha laschà reno-

var la baselgia da S. Maria, donnegiada tras l'incendi dal 1387, sco era la chaplutta da S. Gada. En la liturgia quotidiana cultivava el la spiritualitad benedictina. En il grond schisma è Pultengia stà indecis; el ha probablmain assistì al Concil da Constanza ed ha laschà confermar il 1418 ils privilegis da la claustra tras il papa Martin V. Il 1408 ha el obtegnì la renoconuschientscha dals vegls dretgs claustrals da vart dal retg Ruprecht, il 1413 ed il 1433 era da vart dal retg Sigismund ch'ha probablmain exprimi uschia sia apprezzaziun per l'ospitalitad concedida ad el durant sias campagnas en l'Italia.

En las Guerras appenzellaisas dal 1403 ha Pultengia prendì partida per Sviz. Il 1406 ha el negozià cun Blegn, ensemble cun la vischnanca da Mustér, davart la renovaziun dal contract da traffic dal 1376. Il 1407 è el entrà cun Uri en in dretg territorial, senza pudair garantir duraivlamain la Val d'Ursera a la claustra. Dal 1412 fin il 1419 han entretschaments en la Faida da Razén turmentà l'avat e l'abazia. Cun l'avat Pultengia sco emprim signader è la Lia Grischa vegnida renovada ed amplifitgada il 1424 a Trun. En il spiert dal moviment communal per la pasch dal pajais ha el intermedià cun success suenter il 1424; per cunter n'ha el betg pudì sa retrair dal tuttafatg dals cumbats politics per la pussanza. Il 1425 ha el sustegnì cun truppas da l'abazia e da la Lia Grischa ina campagna da Confederats en la Val d'Ossola. Perquai han quels da la Svizra Interna obtegnì reducziuns da dazi fin a Milaun era per l'abazia. Cunquei che Pultengia ha promovì, sco ses antecessur Johannes von Ilanz, il svilup communal, proseguind ina politica d'allianzas, ha el appartegnì als avats da Mustér ils pli impurtants. Ad el ha Ludovic Hendry deditg ses roman istoric «Pieder de Pultengia» (1964).

Lothar Deplazes

Nicolaus de Marmels

† 1448 a Mustér, descendent d'ina famiglia da ministerials dal Surses. Attestà l'avrigl 1438 sco avat da la claustra da Faveras. Avat da la claustra da Mustér 1439–48. Marmels ha proseguì la politica da ses antecessur Pieder de Pultengia. Il 1440 ha el intermedià en l'allianza tranter la Lia Grischa, la citad da Cuir e ils Quatter Vits che garantiva a la Lia Grischa l'access al commerzi sin il tschancun Cuir-Sargans, ed ha procurà per il success vicendaivel sin ils trajects

da Landquart fin als pass da la Lia Grischa vers il nord, il sid ed il vest. Quell'allianza garantiva era la tscherna libra da l'avat (sigillada il 1455). Il 1440 han ils Uranais accordà a la claustra da Mustér dretgs territorials ed il 1441 l'han els integrà en il contract da pasch cun Milaun e dotà cun l'exemziun da dazi per products claustrals fin a Milaun.

Adolf Collenberg

Johannes Schnagg

Attestà per l'emprima giada il 1464, † 11 da fanadur 1497 a Mustér, oriund da la region dad Augsburg. Avat da Mustér 1464–97. Il 1471 è Schnagg stà participà a l'uniun da la Lia Grischa cun la Lia da las Diesch Dretgiras. Il 1472 ha el cumprà il signuradi da Munt S. Gieri dal cont Jos Niklas von Zollern. Il 1472 ed il 1477 è Schnagg sa cunveggnì cun la vischnanca da Mustér davart l'organisaziun dal regiment communabel respectivamain davart feuds, impegnaziuns e la recepziun da novizs. A las bunas relaziuns cun Milaun (el aveva stipulà ina pasch separada cun Milaun suenter la campagna da Blinzuna il 1478) han mess ina fin l'invasiun dals Franzos en l'Italia a l'entschatta da las Guerras milanaisas ed il cumbat tranter l'Austria e la Frantscha per Milaun. Malgrà las stentas da l'imperatur Maximilian, ch'aveva confermà il 1495 tut ils privilegis a Mustér, ha la Lia Grischa fatg in'allianza cun la Frantscha ed ils 21 da zercladur 1497 cun la Confederaziun (lieu affilià).

Veronika Feller-Vest

Andreas de Falera

* Mustér, † 14 da zercladur 1528 a Mustér, da Mustér. Pader OSB a la claustra da Mustér, avat 1512–28. Il 1514 ha Falera visità l'imperatur Maximilian a Puntina per laschar renovar il dretg da giurisdicziun criminala (dretg da vita e mort) ed ils privilegis da la claustra. L'incendi dal 1514 ha mess la claustra en crisa ed ha provocà intervenziuns da vart dal cumin ch'ha mess l'economia claustrala sut avugadia (1522). Il 1524 ha l'abazia pers il dretg da collatura, ella ha dentant pudì recepir novizs era suenter ils Artitgels da Glion dal 1526. Falera ha pudì sanar las finanzas e spenderar qua tras la claustra, desistind dals dretgs feudals en la Cadi.

Adolf Collenberg

Martin Winkler

Attestà il 1512 sco il pli giuven commember da la claustra benedictina da Mustér, pli tard priur. Elegì (prinzi) avat l'avust 1528. Sut sia regenza èn 200 Libers da Breil (Libers esteriurs da Lags) sa laschads recepir sco burgais dal cumin da la Cadi. Causa sia relaziun cun ina dunna han ses parents sfurzà el da midar confessiun e da maridar. Il 1536 è Winkler sa rendì a Glion, nua ch'el ha fatg il pur e scolast. Cun el han bandunà trais muntgs la claustra ed èn alura stads activs sco plevons reformads. Il magistrat dal cumin da la Cadi al ha pajà (fin il 1550–l'onn da sia mort?) ina pensiun da 300 flurins per renunziar als dretgs feudals da prinzi. Sco recumpensa per il resguard respectivamain il salvament da la claustra tras il cumin da la Cadi (en privel da dissoluziun pervia dals Artitgels da Glion dal 1526) ha quel pretendì per sai il dretg d'elegir l'avat.

Adolf Collenberg

Cristian de Castelberg

* ca. 1532/33 a Mustér, † 22 da favrer 1584, catolic, da Mustér. Figl da Johann Christian e da Luzia nata Stöckl, da Hertenberg (Tirol). Frar da Sebastian. Dretg da pastoraziun concedì tras l'uvestg da Cuir il 1554, alura plevon a Tujetsch. Nominà avat da Mustér tras il magistrat da la Cadi il 1566. Consecrà avat a Nossadunnaun il 1570, suenter avair prestà il profess benedictin. Il 1571 ha l'imperatur Maximilian II confermà ad el tut ils dretgs e privilegis claustrals existents.

Il 1581 ha Castelberg beneventà Carlo Borromeo a Mustér. El ha acquistà meritis spezials oravant tut sco reformader ecclesiastic-religiun en la claustra da Mustér ed en la Cadi.

Ursus Brunold

Jakob Bundi

* 1565 a Sumvitg, † 1614 a Mustér, catolic, da Sumvitg. Studis al collegi dals gesuits a Friburg; ordinaziun sacerdotala 1584. Plevon a Rueun 1584–85 ed a Sumvitg 1585–93. Pelegrinadi a Jerusalem 1591–92. Avat da la claustra da Mustér 1593–1614 ch'el ha administrà cun premura. Autur d'ina cronica da la claustra da Mustér, in register (incumplet e senza urden cronologic) dals avats a partir da s. Sigisbert, e d'in rapport da pelegrinadi («Reissbuch gehn Jherusalem», 1592). Per augmentar il prestige da sia claustra ha Bundi attribui la refundaziun da quella a Carl il Grond.

Urban Affentranger

Sebastian de Castelberg

* ca. 1583 a Mustér, † 3 da zercladur 1634 a Rheinau/ZH, catolic, da Mustér. Figl da Johannes, burser, e da Barbara nata von Planta-Zerne. Nev da segund grad da Cristian e da Sebastian. Studi da teologia a Dillingen (Baviera), Milaun e Paris. Ordinà sacerdot il 1610, alura plevon a Tujetsch. Il 1614 al ha affidà il cussegl da cumin da la Cadi la direcziun da la claustra da Mustér (consecrà avat a Nossadunnaun tras il nunzi Ludovico di Sarego). Sut la direcziun da Castelberg è la claustra vegnida recepida en la Congregaziun benedictina svizra (fundada il 1602). Castelberg è s'opponì cun success a las tentativas da reformar la vita monastica, interprendidas da las claustras da Son Gagl e da Muri il 1618 ed il 1624. El è stà participà al Contract da Lindau dal 1622. Il 1631, suenter avair fatg naufragi sin il champ politic e militar, è el sa retratg en la claustra da Rheinau.

Ursus Brunold

Augustin Stöcklin

* vers la fin dal 16avel tschientaner a Muri/AG, † 30 da settember 1641 a Mustér, catolic. Figl da Johannes, Stiftsamman a Muri. Studi da teologia e filosofia tar ils gesuits a Lucerna a partir dal 1606 ed a Dillingen (Baviera) a partir dal 1610, magister 1613. Entrada en la claustra benedictina da Muri 1614. Suenter l'ordinaziun sacerdotala è Stöcklin turnà il 1618 a Dillingen, nua ch'el ha acquistà il 1619 il baccalaureat en dretg e teologia. Magister a la scola claustrala da Muri 1619–23. Administratur da l'abazia benedictina da Faveras (1623–29) e da la claustra da Mustér (a partir dal 1631), nua ch'el ha organisà, ensemble cun dus auters patres da Muri, la reforma tridentina. Il 1634 è el vegnì elegì dal nunzi Ranuccio Scotti sco avat da Mustér. Cunter quest avat, l'emprim avat betg elegì da la pussanza seculara, è sa furmada in'opposiziun ch'ha dentant pudì vegnir surventschida grazia a la diplomazia dals lieus catolics e da la Lia Grischa. Stöcklin ha rendì l'abazia autonoma visavi la Cadi e l'uvestgieu ed ha renovà ils vegls dretgs suverans. Sco reformader, umanist ed istoriograf polivalent ha el restitui danovamain l'aut renum da la claustra. Sias lavurs èn impurtants per l'istoriografia da las claustras da Mustér, Muri e Faveras.

Urban Affentranger

Glista dals avats (dals origins fin il 17avel tschientaner):

Ca. 750:	Ursicinus
Ca. 800:	Agnellus
Ca. 880:	Prestantius
960-976:	Victor
Doc. 993:	Erchenbert
Ca. 1000:	Adalgott
Ca. 1000:	Otker
Doc. 1048:	Odalricus
Doc. 1112:	Ada
Doc. 1127:	Walter
Doc. 1130:	Eberhard
Suenter 1150:	Hugo
Doc. 1185:	Walter
1203-1207:	Albert von Novenzano
Doc. 1213:	Burchard
1225-1233:	Gualfred
1237-1247:	Konrad
Doc. 1248:	Johannes de Malderon
Doc. 1251:	Anton de Carnisio
1252-1261:	Heinrich
1281-1287:	Rudolf von Reichenstein
Doc. 1288:	Benedikt
Doc. 1288:	Symon
1296-1300:	Nikolaus
1319-1323:	Wilhelm von Planezia
1327-1353:	Thüring von Attinghausen-Schweinsberg
1357-1367:	Jakob Buchhorn
1367-1401:	Johannes von Ilanz
1402-1438:	Pieder de Pultengia
1439-1448:	Nicolaus de Marmels
1449-1464:	Johannes von Ussenprecht
1464-1497:	Johannes Schnagg
1497-1512:	Johannes Brugger
1512-1528:	Andreas de Falera
1528-1536:	Martin Winkler
1536-1537:	Jodokus Kreyer
1538-1538:	Leonhard Feurer
1538-1551:	Paul Nicolai
1551-1566:	Lucius Anrich
1566-1584:	Cristian de Castelberg
1584-1593:	Nikolaus Tyron
1593-1614:	Jakob Bundi
1614-1634:	Sebastian de Castelberg
1634-1641:	Augustin Stöcklin
1641-1642:	Josef Desax
1642-1655:	Adalbert Bridler

Lexicon Istorico Retic

Il LIR cumpiglia bundant 3100 artitgels (geografics, tematics, artitgels da familias e biografias) davart l'istoria grischuna/retica e la Rumantschia. Editura: Fundaziun Lexicon Istorico Svizzer; versiun online: www.e-lir.ch; versiun stampada: www.casanova.ch u en mintga libreria.